

分途勘驗酌設鍊廠就地收砂遇有勘獲佳鑛查係官地應歸公司註冊管業如係民地即由公司定價收購將來或招商承辦分設公司或酌派員紳自籌開採視集股之多寡次第舉行所有本省外省紳商人等有願籌集資本請辦各路鑛務者祇准指定一鑛作為總公司之分公司按照總公司所定章程切實遵守無論何人概不准逕自請辦以一事權此外民間資本無多用法就鑛自行開採者悉聽其便惟所出五金鑛砂概歸總公司作價收買設廠鍊售應抽鑛稅即就鑛砂價內照數扣解以重國課似此變通推廣庶足以隱杜侵越開闢利源謹 奏奉 硃批戶部知道欽此

安徽巡撫誠會同兩江總督魏奏安徽先設全省鑛務總局以保利權片

再時局艱難開闢利源為當務之急皖省重山磅磚鑛產甚繁特以民間惑於風水大率置諸不顧到任後即飭商務局剴切諭導並邀集廉正紳商妥籌辦法旋據該紳江蘇候補道蒯光典等稟稱現已公同商酌擬請先設全省鑛務總局以保自有之權利以立開辦之基礎惟民志未一必得公正紳士隨時考察調護應公舉鄉望素孚之正紳專司其事仍請另派廉明委員監督經理以期聯絡而事當創始需用浩繁擬由紳先籌銀十萬兩更請酌撥官款以助之一面仿照湖南辦法廣招股本以厚商力凡以前已辦各鑛及業經議定之處

仍照原案辦理其有遵照新章請辦或已議採驗未領執照與夫未辦者均歸總局核議但勘鑛不精開採即難收效擬延著名鑛師派員偕往各州縣會同官紳確查鑛產分別官地私地何等鑛質有無妨礙詳註於冊爲次第開辦張本等情稟請奏咨並據商務局司道具詳前來正在核辦間適准商部咨欽奉諭旨福建興泉永道袁大化著發往安徽辦理全省鑛務欽此仰見朝廷興利惠民之至意伏思鑛產乃天地自然之利若開採如法經理得人則因民之所利而利之裕國便商兩有裨益該紳等請先設鑛務總局爲自保利權起見所擬辦法亦均屬目前切要之圖且原議本擬公舉正紳與大學士孫家鼐等所奏若合符節自應俯如所請仍官督商辦俾有責成將來袁大化到皖即飭總理其事並將一切章程責令分別妥議詳請奏咨立案屆時再由選派監督官一員專司稽查征稅各務以期互相維持謹奏

直隸延慶州設立種植局栽種各項樹株稟

竊奉本府札開以王政首重樹桑地道獨稱敏樹種樹之利古人言之甚詳宜屬十州縣地高山多田少平壤尤以種樹爲宜通飭各州縣傳諭城鄉各紳董保甲實力勸導凡有主曠地飭令業主自種無主曠地以及道路公地城郭官地或由公贖或提公項或由官籌款分